

Ḳapiya Sën Jon Kevu Netu Löö Vu Kerisi-yi-alam

¹ Kerisi-yi-alam hir ggev ti sa, besa nekevu ḳapiya sënë yök vu hong Gayus. Sa nehalë hong bë sarig sogek hong, in sahëg neving hong yönon rot.

² Oo sa mehö sogek! Sa bë ngaa pin sën genevong lo anon jak nivesa, gesa bë gemedo nivesa geving. Seraḳ ni bë kenum nedo nivesa.

³ Hil arid lo la deverup vu sa bedenër bë genesepa loḳ gägek anon, lob sa kwag vesa rot. Yönon rot, seraḳ ni bë vare geneya los gägek anon. ⁴ Sa nehango bë sa hurmahen lo saga denesepa loḳ gägek anon, og sa kwag vesa rot. Lob sa su kwag vesa in ngaa ngwë kesuu sën sa kwag vesa in sir agi rë.

Gayus Nevong Huk Nivesa

⁵ Oo sa mehö-e! Sën genelok vu hil arid lo lo, og saga genevong nivesa. Yönon, geneḡin Kerisi-yi-alam sën deneyam vu nyëḡ vahi lo ving, om sagraḳ genevong nivesa rot. ⁶ Hil arid lo sënë denare Kerisi-yi-alam pin malaj medenër hong rangah bë ahëm neving sir. Om ngo gemedo gwevong nabë saga vu sir sën denah medenom lo, megedok vu sir in ngaa-aggata-yi noh vu sën Anutu ahë neving lo, og sagraḳ nivesa. ⁷ Alam nebë sënë deneya huk sënë in bë degeḳo Yesu arë jak, lob su denëḳo monë lu ngaa vu alam dahis rë. ⁸ Om hil adok vu

alam nebë sënë megegin sir nivesa, in hil los sir nehebë loḵ ti in huk gägek-anon-yi.

Diotrepes Nevong Paya

⁹ Sa kevu gägek ti yök vu Kerisi-yi-alam saga wirek, rëḵ Diotrepes nevongin bë natu alaj, lob su bë nenga vu he gägek rë. ¹⁰ Om nabë senök vu ham, og mëm sëḵ nanër yi ngaa sën nevong lo rangah vu ham. Netanë gägek kuungsën nipaya paya raḵ he. Lob su nevong sënë mu rë, gaḵ nevong nebë sënë gesu neḵo hil arid sën Kerisi-yi-alam lo deneya ben menegin sir ving rë. Lob neggërin Kerisi-yi-alam vahi ving, bë su degeḵo sir vahi sën deneyök vatëveḵ aga doḵ na hir beggang, genetii sir ya in dub.

Demetrius Nevong Nivesa

¹¹ Oo sa mehö-e! Su gesepa doḵ ngaa nipaya nabë saga. Gaḵ gesepa doḵ ngaa nivesa. Mehöti sën gevong ngaa nivesa lo, og Anutu yi mehö yi. Gaḵ mehö sën nevong ngaa nipaya lo, og mehö saga su raḵ Anutu ni rë. ¹² Demetrius og alam pin denëḵo arë raḵ, lob Anutu yi gägek anon vong barë böp raḵ ving. Gehe nehäḵo arë raḵ ving, log geraḵ ni bë he nanër gägek og he nanër yönon.

Gägek Hus

¹³ Sa bë kevu gägek ngahiseḵë vu hong, rëḵ mu sa kwag nevo bë su yoh vu bë sa kevu jaḵ bël veriik doḵ ḵapiya rë. ¹⁴⁻¹⁵ Gaḵ sa hevongin bë senök pevis balu mëm medo doḵ ti bebengwëng. Ayom gëp revuh. Hil alam kwaj nevo hong medenenër.

Log genanër sayeg vu sa mehö lo nabë sa kwag nevo sir menanër.

Gagek Mewis
The New Testament in the Central/Mapos dialect of the
Buang language of Papua New Guinea
Nupela Testamen long tokples Buang Mapos long
Niugini

Copyright © 2003 The Bible Society of Papua New Guinea

Language: Buang, Central/Mapos (Buang)

Dialect: Central/Mapos

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files dated 9 Oct 2020

18a972db-abcc-5dc3-9031-f1d4455b33c3